

**Oqaluuserisassanut nassuiaat.**  
(Inatsisartut Siulittaasuat)

Jens Kristian Therkelsen, Siumut, aamma Kuno Fencker, Siumut, apuussimalerput Inatsisartunullu tikilluaritsi.

Inatsisissatut siunnersuummik nutaamik immikkoortutut 178-itut normulimmik oqaluuserisassanut ilanngussisoqarnissaanik Naalakkersuisut qinnuteqarput.

Immikkoortup 178-ip qulequtaraa: Uunga siunnersuut: Ruslandip Ukrainemut sakkortuuliornerata kingunerisaanik Ruslandimut il.il. pineqaatissiinissaq pillugu Inatsisartut inatsisaat.

Immikkoortoq ulloq 12. maj siullermeerneqarluni, aappassaaneerneqarlunilu pingajussaaneerneqassaaq.

Oqaluuserisassani immikkoortumik 117-imik ilanngussisoqarnissaa Siulittaasoqarfiup akueraa.

Immikkoortup 117-ip qulequtaraa: Qanoq iliorluta nioqqutissat nunarsuatsinni akiisa sorsunnerup kingunerisaanik qaffakkiartupiluulernerat innuttaasunut kingunerluutaannginnerpaamik inissinniarlugu suliarisinnaavarput?

Immikkoortoq ulloq 12. maj oqaluuserineqassaaq.

Oqaluuserisassani immikkoortut marluk, tassa immikkoortut 122 aamma 172, siullermeerneqarnissaasa nuunneqarnissaannik Naalakkersuisut qinnuteqarput.

Immikkoortut aqagu ulloq 27. april siullermeerneqartussaagaluarput.

Immikkoortut ulloq 5. maj siullermeerneqassapput ullorlu 25. maj aappassaaneerneqarlutik.

Immikkoortut pineqartut qulequtaraat:

Immikkoortoq 122: Inatsisartut aalajangiiffigisassaattut siunnersuut Naalakkersuisut peqquneqassasut akileraartarnermi aaqqissuusseqqinnissamut siunnersuuteqassasut, akileraartarnermut ingerlatsineq ajornannginnerusoq, Kalaallit Nunaanni akileraarut ataatsimoortumik apparluni aammalu aningaasarsianut akileraarutit appartinneri ilaliullugu. Siunnersuut UPA 2023-mut saqqummersussanngorlugu suliarineqassaaq.

Immikkoortoq 172: Ukiumoortumik akileraartarnermut allagartamut nassiussinermi ilanngussatut akileraarutit procentinngorlugit kommuneni Namminersorlutillu Oqartussat ataani susassa qarfinnut sorlernut tamakkiisumik aningaasartuutit procentinngorlugit takussutissaqalernissaat pillugu Naalakkersuisut peqquneqarnissaannut Inatsisartut aalajangiiffigisassaattut siunnersuut.

Oqaluuserisassani immikkoortup 10-p: Aningaasaqarnikkut Ingerlatsineq pillugu Nalunaarut 2022, oqaluuserineqarnissaa 25. majimut nuunneqarpoq.

**Taasisarnerit pillugit uku akornanni isumaqatigiissuteqartoqarpoq:**

Pipaluk Lynge-Rasmussen, Inuit Ataqtigiit aamma Siverth K. Heilmann, Atassut.

Knud Mathiassen, Inuit Ataqtigiit aamma Pele Broberg, Naleraq.